

我一星期零一日前識咗個女仔，  
我愛上咗佢。

作者: 栩梧

Powered by [紙言](#)

# 一切之前

「喂？做咩？」我同係電話入面嘅呀明講。

「想問吓呢，你知唔知個隊係旺東站做開嘅busking team叫咩啊？」

「大佬我點知..我又唔係個頭busk開..」

「栩哥幫幫手啊！最多一餐飯！」佢用懶係慘嘅聲黎求我。

我反咗個白眼，然後直接講咗個隊名比佢知。係啊！其實我知，而且有一個隊員我係識嘅。

「咁得未？冇嘢...」 「你肯搵條女未啊？」呀明打斷咗我。

唔係你話搵就搵咁簡單...

佢所謂嘅個條女，只不過係有次碌ig嘅時候我話：「如果識到就好。」嘅一個女仔。睇相望落唔高，我估16x多右，係啱啱好嘅身高同有啲肉地，齊陰加眼大大，個咀仲要係性感地厚。最重要嘅係佢唱歌好鬼好聽。之前去親聽佢busking都一定會聽到哥哥首有心人。唔知係佢純粹鐘意定係唱比男朋友聽。啊係，條女最唔掂就係名花有主呢一吓。

「咪玩，人地有仔。btw唔講啦，係咁啦。」我話。

我講完之後就cut咗佢線，繼續返今日嘅假期。望一望手機，發現原來已經一點幾，差唔多要起身。我個人好唔鐘意起身之後唔沖涼唔刷牙就做其他野，唔知為咩但係唔做齊都真係幾冇feel。搞掂曬所有野，又係時候諗買邊間外賣。呢種生活係自從個ex走咗之後先開始。

-----  
「喂栩b~」唔知幾時開始我女朋友就係用呢個名黎叫我。其實個名係有啲唔知點咁架啦，叫吓叫吓又好似習慣咗咁，所以就由佢咁樣叫我。愛情就係咁樣架啦，有啲嘢擺到明係唔知點樣咁，不過你就係因為每一日都有佢嘅出現，就慢慢逐漸習慣咗。

「咩事啊？」我坐咗係床上面大嗌出門口，佢啱啱去完街市返黎。

「冇啊，今晚你想幾點食飯啊？」佢路講一路行入黎搵我。

每日唔係對住部琴就係對住枝結他嘅我，唔係好留意到我女朋友個身上面著住啲咩，甚至有冇化妝，不過佢呢吓扎住頭髮行入黎真係搞到我有少少心動。佢著住一件有少少鬆身嘅白色T，隱隱若若見到佢個黑色bra，呢種若隱若現嘅感覺真係好令人吸引，然後一條黑色帶白邊嘅運動熱褲，將佢白滑到基本上毛都冇條嘅長腿毫無遮掩咁展露係大氣之中。講真如果有條女咁樣係你面前，就算對咗10年嘅女朋友都係會令到你冇起帳篷嘅感覺。

「b~」佢嗌我。

「...」我掛住望佢嘅身材望到我冇比到反應，因為我真係唔想將係佢身體上嘅視線移開。

「喂~你做咩呆咗咁望住我啊？」佢慢慢爬上黎我到。正對住我咁坐係我大牌上面，用佢幼細嘅雙手撓住我條頸，一邊係我耳邊細細聲講嘢，一邊掃我嘅頭髮。

「我諗緊幾點食飯好啲嘛..」我都唔知點解我要講大話。

「明明就係望住我對波黎發呆！你係咪又諗埋啲衰嘢！」佢用少少嬲嘅語氣講，不過我知道佢只係得把口。

「咁我嘅柔柔咁靚，唔睇望多幾眼點得啊？」

「又口花花啦~唔理你啦！而家我去煮飯啦，一間仲要拖地啊！」柔柔有啲怕羞咁講。

「愛你啊。」係佢慢慢企返起身嘅時候我錫咗佢一啖，之後佢再輕輕咁錫返我。

我同柔柔一齊咗大概兩年半，平時屋企嘅野都係佢幫我搞。食嘢，執屋，打掃之類，我只要比租，間唔中買嘢比佢氹吓佢開心，一有時間就陪吓佢就夠。以我個人黎睇呢段關係，我唔覺得有咩問題，自

少佢係愛我又唔會點亂發脾氣。我亦都好愛佢，我收入唔多但係都會將大部份嘅錢投放係呢個家人面。冇錯，我同佢連婚都未訂我已經將呢到當咗係一個家，因為我真係好想同佢行落去。

-----

今晚嘅晚飯係焗豬，仲要係唔好食嘅焗豬。飯同個豬好難唔好食所以冇咩事，但係個汁真係搞唔掂，有一陣唔知咩味係到，仲要好撻酸。

勉勉強強食完之後我又攤返係床到揸手機，但係諗起呀明今日叫我試吓去搵個個唱歌嘅女仔，我隨手就係Following個到Search佢個profile出黎。

「sing\_nicho1e...」我自然自語...

「不過我第一句應該講啲咩好呢？講hello又好似好狗公咁，喂人地又好似唔係幾好咁...又唔熟...唉！點解搵一條女都可以咁撻煩架？」我呆咗係個chatroom到十幾分鐘，依然都係打唔出啲咩。

諗咗陣都係諗唔撻到，打算去拎少少嘢飲吓，點知望一望個鐘，屌！原來已經凌晨三點幾，聽日仲要起身去錄音。所以最後是是旦旦打咗句「hi我係呀栩，想睇吓你有冇興趣一齊busking架。」就算數。因為聽日真係要開工，黎緊有一個大Project係要幫一個網絡歌手錄音，而家唔訓之後都冇得我訓，Send完個message比Nichole就走咗去梳洗準備訓覺。

「叮~」啱啱放低嘅手機又響起黎。

我望咗一望... 係佢！「hi~你點解會搵到我嘅？」

# 有心人

正係我想瞓嘅時候，手機突然響起Instagram嘅通知聲。

「hi~你點解會搵到我嘅？」Nichole覆返我個一句好見外嘅開場白。

其實我就諗住訓覺，不過唔知點解係收到Nichole個Direct

Message之後，個心就有少少激動..係莫名嘅激動。係同個ex分手之後我都真係冇咩搵過女，唔好講平時會唔會見面，直頭係網絡上都唔會冇啦啦搵女講嘢。身為一個毒撚，係呢啲情況咁緊係唔覆最好。因為...我真係好眼訓，而家都就黎朝早四點，有咩事聽日先講啦大佬。冇錯，毒撚性格就係咁架啦，麻煩啊嘛。

## 如果真的太好 如錯看了都好

「唉屌！」我拎咗個手機去我眼前，一嘢就熄咗個鬧鐘。

唔知點解我係突別鐘意哥哥首有心人，我之所以會去聽Nichole

Busing都係因為佢唱呢首歌。聽吓聽吓又覺得佢唱歌都幾好聽，所以就有follow佢，佢有Busking我又得閒的話我就會去聽佢Busking。不過，起身嘅煩躁感比起冇我睇到嘅嘢所帶黎嘅感覺強烈。

「我聽晚都會出去Busking啊，你想可以跟埋黎。<sup>(0423)</sup>」...「再唔係可以食個飯先啫！<sup>(0435)</sup>」...

係呢一刻見到呢兩句嘢，如果我係一個普通嘅毒撚的話，肯定會覺得佢對我有嘢。不過我一直都知道以我呢個死人樣，唔好講女啦，小朋友見到我都想走。唔好玩啦~仲要我係知佢有男朋友，佢應該都只係想有比人一個好鬼nice嘅感覺人姐。所以我都只係比個like係佢個兩句嘢到，再覆句「Busking可以跟，不過我約咗人食飯啊，Sorry！」就算。然後..我又開始返我無聊嘅一日。

我平時冇咩嘢做，都係係屋企寫吓歌，不過多數都寫唔到啲咩，靈感唔會冇啦啦跌落黎比你，所以咁多人食煙隊草做通宵，唔係點趕到課比啲唱片公司。不過講開又講，啲唱片公司真係好撚chur，都話咗死線前一定比到佢，係都要我早少少比佢聽兩嘢先。即刻唔撚信我啦？咁佢唔信又有道理，我都唔係好信得過我自己嘅其實。

寫吓寫吓個天好似黑黑地，全日鐘都冇睇過...屌！已經六點幾。我即刻擺返部手機黎望吓冇冇人搵我，原來Nichole係IG有搵過我。

「喂我地七點開始啊，係返旺東，你黎到就黎啦！」七點.... 仆街！

我由屋企出去都要成個鐘，而家已經六點...

為咗音樂(其實係為咗女人)我啦啦臨換咗件衫，就直接出咗去。係行快步嘅同時我打開手機，諗住是是旦旦寫個藉口話我冇睇手機所以而家先出黎。點解要講大話？咁都係同人地第一次約出黎，冇睇人message之後冇出到門口真係好撚失禮，唔講吓大話令件事好睇少少，之後比咗個唔好嘅印象人地，都真係End Game，唔使再搵人地。

呢一段車程我唔知點解覺得好漫長，可能主要係我緊張得制，同埋我都係諗唔到同咩藉口。

「喂呢到啊！」有一把好甜嘅聲嚟住我大嗌。

我同個女仔對視咗吓，再左望右望確保冇人應佢，如果佢唔係嗌我但係我應咗就真係好撚柒。

「喂呀翹！」同一把聲又嗌我，咁好撚肯定係叫緊我。

「Hello~唔好意思啊遲咗黎...」我用尷尬而不失禮貌嘅笑容去回應。

「哈哈~唔緊要啊，你準備吓先啦，我地唱多首你先再上？」

「OKAY！」我比咗個OK嘅手勢佢。

睇住Nichole彈吓彈吓咁跳返入去佢隊Band到，感覺好好笑，又好可愛。都十幾歲人啦仲係到彈吓彈吓咁行...成個大細路咁。不過佢笑嘅時候真係好正，好有一種正能量直接撞去你個心到咁樣。雖然

之前都已經有同過佢講嘢，不過今日相對起我同佢都有咁放開黎交淡，直程係有啲見外。事關佢男朋友一直佢我隔離，我嘅直覺話比我知佢唔係啲咁善男信女。咁直覺？男人嘅直覺，女人未必睇到透呢個位。不過話時話，Nichole叫我預備吓先，但係我都有咁嘢可以準備，因為所有嘅樂器等等佢地都已經準備好曬。企係到都咪話唔尷尬，佢男朋友問唔使就睇我。

「下一首係有心人... 呼~」Nichole深呼吸咗一下。

「1..2.. 1..2..3..4....」

隨住Nichole數嘅拍子音樂隨即響起，結他嘅勾線帶動現場嘅氣氛，令人有一種形容唔到嘅傷心。

### **寂寞也揮發著餘香 原來情動正是這樣 曾忘掉這種遐想 這麼超乎我想像**

今日佢比起平時唱呢首嘅時候有少少唔同，係有種甜甜地又幸福嘅感覺。但係明顯唔係因為我係到，而係我隔離個男人係到。

### **如果真的好 如錯看了都好 不想證實有沒有過傾慕 是無力 或有心 像謎 像戲 誰又會 似我演得更好**

聽聽吓莫名地有一種係心入面嘅陣痛。「可能係因為聽到Nichole唱歌，唔知點樣又產生咗共鳴所以會咁樣心痛？」 -

我當初係咁樣認為。因為呢一刻我望住嘅係Nichole，比人打我都沒必有感覺。佢唱歌嘅時候比平時更加有吸引力，唔係講樣講身材咁膚淺，而係講緊氣質。雖然未去到有「仙氣」嘅地步，但至少係個種會令你諗「啊呢條女都有文青嘅感覺，應該係溫柔又得體，出得廳堂入得廚房嘅類型」嘅女人黎。

「喂！發咩呆啊？上黎彈啦！」Nichole一邊拉住我行一邊講。

正當我回個神來嘅時候，我第一眼係望到一個男人好好好憤怒嘅眼神。

「我自己行到啊..」

「我想縮開隻手，事關啲觀眾都好似有少少唔鐘意我，但係更甚嘅係你男友好似想殺死我。」

「咁見你唔理我啊嘛！嗌咗你幾聲都有理我！」

「係啦係啦... 頂你痛架！」佢打咗我一嘢，真心有少少痛。

Nichole係我面前做咗鬼臉就有理我，直接同其他隊友討論要唱咩歌，而我就企咗係則邊等佢地。

我對於Busking真係咁好熱心嘅想法，因為對我黎講只不過係玩同享受，音樂原本應該係一樣咁嘅嘢。至於係我上台之後嘅事，基本上冇咁咁發生，除咗覺得Nichole令我有心動嘅感覺，就係佢條仔對我不懷好意嘅眼神，係全程睇到我實一實，真係一刻令我擔心自己嘅菊花。去到走嘅時候，依舊係一班人係到圍堆，由講今晚表現到講去唔去食糖水。而我依舊企係則邊到等，因為.. 都唔熟...

「喂！多謝你啲！」一隻纖細嘅手拎咗枝水比我。

「哈哈！多咁謝啦少事！」我一手就接過枝水。

係我眼前嘅並唔係Nichole，而係頭先打木箱鼓嘅女仔，小渝。佢身高都有170，瘦低長腿，樣就普普通通，衣著係韓風少少但又有的豪氣嘅女仔。

「做咩成日企埋一二邊啊？」小渝問我。

我有答到佢，始終係第一次見面嘅陌生人，唔想比佢知得太多。

「咁樣係溝唔到女架啲，特別係有男朋友嘅女仔。」小渝挨係牆到望住個月亮，然後一副睇清睇透嘅表情望住我。

「個位有人就無為逼入去啦...係咪？」我好概嘆咁講。

「唔知呢？不過有樣嘢係關於佢嘅我好肯定。」佢望咗我一眼，然後懶係嘢咁講完又望返個天。

我呢一刻決定保持沉默，等佢講出黎。

「嘻...」

「你唔好以為你細細聲笑我就唔知啊，有咩快講啦，Nichole佢地過緊黎。」我拍一拍小渝個頭。佢控咗埋黎我耳邊，細細聲咁講：「其實Nichole唔係真心鐘意佢條仔。」